

五

倫

書

五倫書卷之十三

養道

善行

養老

有虞氏深衣而養老。養國老於上庠。養庶老於下庠。用燕禮。

夏后氏燕衣而養老。養國老於東序。養庶老於西序。用饗禮。

殷人縞衣而養老。養國老於右學。養庶老於左

學用食禮

成周玄衣而養老。養國老於東膠。養庶老於虞庠。兼用虞燕夏饗殷食之禮。凡五十養於鄉。六十養於國。七十養於學。達於諸侯。八十拜君命。一坐再至。瞽亦如之。九十者使人受。五十杖於家。六十杖於鄉。七十杖於國。八十杖於朝。九十者天子欲有問焉。則就其室。以珎從。凡三王養老皆引年。八十者一子不從政。九十者其家不從政。瞽亦如之。

文王為西伯時。制其田里。教之樹畜。導其妻
子。使養其老。五十非帛不暖。七十非肉不飽。
不暖不飽。謂之凍餒。文王之民。無凍餒之老
者。此之謂也。○伯夷。辟紂居北海之濱。聞文
王作。興曰。盍歸乎來。吾聞西伯善養老者。太
公辟紂居東海之濱。聞文王作。興曰。盍歸乎
來。吾聞西伯善養老者。天下有善養老者。則
仁人以為已歸矣。

漢文帝元年。詔曰。老者非帛不暖。非肉不飽。今

歲首不時使人存問長老。又無布帛酒肉之
賜。將何以佐天下子孫孝養其親。今聞吏稟
當受鬻者。或以陳粟。豈稱養老之意哉。具為
令。有司請令縣道年八十以上。賜米肉酒九
十以上。加帛絮。賜物及當稟鬻米者。長吏閱
視。丞若尉致不滿九十。嗇夫令史致二千石
都吏循行不稱者督之。

武帝建元元年四月。詔曰。古之立教。鄉里以
齒。朝廷以爵。扶世導民。莫善於德。然即於鄉

里先耆艾奉高年。古之道也。今天下孝子順
孫。願自竭盡以承其親。外迫公事。內乏資財。
是以孝心闕焉。朕甚哀之。民年九十已上。以
有受鬻法。為復子若孫。令得身帥妻妾。遂其
供養之事。

宣帝地節三年三月。詔賜高年帛。後以鳳凰
神爵集。甘露降。賜天下高年帛。

平帝元始元年。詔天下吏比二千石已上年
老致仕者。三分故祿。以一與終其身。

明帝永平二年冬十月。帝幸辟雍。初行養老

禮。以李躬為三老。

老人知天
地人事者

桓榮為五更。

知

行更代
之事者

三老服都紵大袍冠進賢扶玉杖乘

輿到辟雍禮殿御坐東廂遣使者安車迎三

老五更於太學講堂帝迎於門屏交禮道自

阼階三老升自賓階至階帝揖如禮三老升

東面三公設几九卿正履帝親袒割牲執醬

而饋執爵而酌

音

祝鯁在前祝饁在後五更

南面三公進供禮亦如之明日下詔賜榮爵

關內侯。三老五更皆以二千石祿養終厥身。

章帝建初二年冬。行饗禮。以故司空伏恭為三老。侍中騎都尉周澤為五更。○章和元年七月。詔曰。秋令。是月養衰老。授几杖。行糜粥飲食。其賜高年二人布帛各一匹。以為醴酪。

安帝元初四年七月。詔曰。月令仲秋養衰老。授几杖。行糜粥。方今案比之時。郡縣不奉行。雖有糜粥糠粃相半。長吏怠事。莫有躬親。甚違詔書養老之意。其務崇仁恕。賑護寡獨。稱

朕意焉○李充為左中郎將年八十以為國
三老帝常特進見賜以几杖

三國魏文帝黃初中蘇林為博士給事中以老
歸第國家每遣人就問之數加賜遺年八十
餘卒

後魏孝文帝行養老禮詔前司徒山陽郡公尉
元前大鴻臚卿游明根並明允誠素歸老私
第可謂知始知卒希世之賢也元以八十之
年宜處三老之重明根以七十之齡可充五

更之選。於是養三老。五更於明堂。國老庶老於階下。帝再拜三老。親袒割牲。執爵而饋。於五更行肅拜之禮。賜國老庶老衣服。有差。禮畢。賜步輦一乘。詔三老上公祿。五更元鄉俸。供養終身。

後周武帝保定三年。以太傅燕國公于謹為三老。帝親幸太學以食之。三老入門。帝迎拜門屏間。三老荅拜訖。升席南面。憑几而坐。以師道自居。帝跪設醬豆。親自袒割。三老食訖。帝

復跪授爵以醕。有司撤訖。禮成而出。○建德二年。詔曰。尊年尚齒。列代弘規。序舊酬勞。括王明範。朕嗣承洪業。君臨萬邦。駁彼兆庶。寘諸仁壽。軍民之間。年多耆耄。眷言衰暮。宜有優崇。可頒授老職。使榮霑邑里。

唐太宗貞觀元年。給復天下一年。民八十以上。賜粟帛。百歲加板授。三年。賜孝義之家粟五斛。八十以上二斛。九十以上三斛。百歲加絹二匹。○十一年。車駕在洛陽。幸甄權宅。禮高

年也。權穎川人。精曉藥術。為天下之最。時年一百三歲。拜朝散大夫。賜以粟帛被褥几杖。因詔百歲以上者給侍五人。○十九年二月。發洛陽征遼。所經州縣。賜高年粟帛。十月。次營州。召父老年七十以上。賜繒帛綾錦。

高宗顯慶三年。賜民八十以上。氍毹粟帛。五年。民年八十以上。版授刺史縣令。賜酺三日。婦人八十以上。版授郡君。賜氍毹粟帛。麟德二年。賜民年八十以上。版授下刺史司馬縣

王倫書卷十三
令婦人郡縣君

玄宗開元二年九月。引京師侍老宴于含元殿庭。詔曰。古之為政。先於尚老。居則致養。禮傳三代。行則就見。制問百年。蓋皇王之勸人教黎庶之為子。朕寅奉休曆。祇膺聖謨。因秋歸而歲成。屬星見於郊祀。念其將智。左傳老將智而耄及尤重乞言。禮記內則凡養俾伸恩於杖期。布惠於鄉國。九十以上宜賜几杖。八十以上宜賜鳩杖。所司准式。天下諸州侍老宜

令州縣遂穩便設酒食。一准京城賜几杖。其婦人則送几杖于其家。○十一年正月。車駕幸北都。詔太原府父老八十以上。賜物五段。版授上縣令。賜緋。婦人版授上縣君。九十以上。賜物七段。版授上州長史。賜緋。婦人版授郡君。百歲以上。賜物十段。版授上州刺史。賜紫。婦人版授郡夫人。

肅宗至德元年。即位於靈武。詔天下耆壽各賜物五段。侍老版授太守縣令。仍各賜物五

王倫書卷十三
一
陔

德宗貞元五年以太子少傅兼禮部尚書蕭
昕為工部尚書前太子少詹事韋建為秘書
並致仕仍給半祿料後授致仕官者並宜准
此舊例給半祿及賜帛其俸料悉絕帝念歸
老之臣特命賜其半焉致仕官給半祿自昕
等始也

宋太祖時廬縣尉鄆陵許永年七十有五自言
其父瓊年九十九兩兄皆八十餘乞一官以

便養。因即瓊厚賜之。授永鄆陵令。給俸以終養。

太宗端拱四年。詔賜京城高年帛。百歲者加賜塗金帶。再遣使賜孤老貧窮人千錢及米炭。

真宗幸河北。賜京城父老衣帛。至澶州。賜父老錦袍茶帛。又名見大名府父老勞。賜之。

元成宗詔賜天下高年帛。八十人一匹。九十人二匹。孝子順孫堪從政者。量才任之。親年七

十別無侍丁者。從近遷除

順帝至正元年十二月。詔民年八十以上。蒙
古人賜繒帛二表裏。其餘州縣旌以高年者
德之名。免其家雜役。

國朝洪武二十年閏六月

太祖皇帝謂禮部試尚書李原名曰尚齒。所以
教敬事長。所以教順。虞夏商周之世。莫不以
齒為尚。而養老之禮。未嘗廢。是以人興於孝
弟。風俗淳厚。治道隆平。曩者朕詔天下行養

老之政。凡耆民年八十以上。鄉黨稱善。貧無產業者。月給米五斗。酒三斗。肉五斤。九十以上。歲加帛一匹。綿一斤。若有田產能自贍者。止給酒肉絮帛。其應夫鳳陽二府富民。九十以上。賜爵社士。八十以上。賜爵里士。咸許冠帶。復其家。尚慮有司奉行不至。爾其以朕命申之。

洪武三十五年十二月。

太宗皇帝諭禮部臣曰。公侯年老者。厯事

皇考多效勞勤。今筋力既衰。日與羣臣並入朝。參觀其步趨之艱難。朕所不忍。自今令朔望朝見。任事者不在此例。○永樂元年九月。禮部尚書鄭沂。戶部左侍郎嚴奇良。通政司右通政丘顯俱以年老。賜誥勅令致仕。陞辭。賜宴。復賜鈔為道里費。顧謂禮部臣曰。沂等昔事

皇考。位大臣。雖為建文所黜。朕已復其官。顧今俱老。宜優佚之。然君臣之間。進退當以禮。故

加宴賚令歸。用全始終之義。自今凡

皇考舊臣老不任事。令致仕者。優待之禮。一視
沂等。毋或不及。

崇儒

商成湯之於伊尹。學焉而後臣之。故不勞而王。
列國。晉平公之於亥唐也。入云則入。坐云則坐。
食云則食。雖䟽食菜羹。未嘗不飽。蓋不敢不
飽也。

齊宣王欲中國而授孟子室。養弟子以萬鍾。

王伯善卷十三
使諸大夫國人皆有所矜式

漢高祖十二年冬。過魯。以太牢祠孔子。詔諸侯王卿相至郡。先謁孔子廟。而後從政。

文帝時。天下亡治書者。聞齊有伏生。故秦博士。治尚書。年九十餘。老不可致。乃詔太常使人受之。太常遣晁錯受尚書伏生所。還因二書稱說。詔以為太子舍人。

武帝時。御史大夫倪寬有俊才。初見帝。語經學。帝說之。曰。吾始以尚書為樸學。弗好。及聞

寬說可觀。乃從寬問一篇。擢為中大夫。其後
詔求為韓詩者。徵蔡義待詔。久不進見。義上
疏曰。臣山東草萊之人。行能無所比。容貌不
及衆。然而不棄人倫者。竊以聞道於先師。自
託於經術也。願賜清閒之燕。得盡精思於前。
帝召見義說詩。甚說之。擢為光祿大夫給事
中

宣帝即位。聞衛太子好穀梁春秋。以問丞相
韋賢。長信少府夏侯勝。及侍中樂陵侯史高。

皆魯人也。言穀梁子本魯學。公羊氏廼齊學也。宜興穀梁。時蔡千秋為郎。召見與公羊家並說。帝善穀梁說。擢千秋為諫大夫給事中。後有過左遷平陵令。復求能為穀梁者。莫及千秋。帝愍其學且絕。廼以千秋為郎。選郎十人從受。

元帝即位。徵高密相孔霸為師。霸上書求奉孔子祭祀。帝下詔曰。其令師褒成君關內侯霸以所食邑八百戶祀孔子焉。故霸還長安。

子福名數於魯奉夫子祀。帝好儒術文辭。頗改宣帝之政。言事者多進見。人人自以為得帝意。○初元四年。詔博士弟子毋置負。以廣學者。帝少而好儒。及即位。徵用儒生。委之以政。貢禹薛廣德韋玄成。匡衡迭為宰相。

平帝詔太師孔光曰。聖人之後。先師之子。德行純淑。道術通明。居四輔職。年耆有疾。令太師毋朝。十日一賜飧。賜太師靈壽杖。黃門令為太師省坐。置几。太師用杖。

明帝時九江人鮑駿上書言丁鴻經學至行
帝甚賢之詔徵鴻至即召見說文侯之命篇
賜御衣及綬稟食公車與博士同禮○永平
十五年東巡過魯幸孔子宅祠仲尼及七十
二弟子親御講堂命皇太子諸王說經帝自
制五經要說章句令桓郁校定於宣明殿其
後帝親於辟雍自講所制五經章句已復令
郁說一篇帝謂郁曰我為孔子卿為子夏起
予者商也又問郁子幾人能傳學郁曰臣子

皆未能傳學。孤兄子一人學方起。帝曰：「努力教之。有起者即白之。」

章帝建初四年十一月。詔曰：「蓋三代道人教學為本。漢承暴秦。褒顯儒術。建立五經為置博士。其後學者精進。雖曰承師。亦別名家。孝宣帝以為去聖久遠。學不厭博。故遂立大小夏侯尚書。後又立京氏易。建武中。復置顏氏嚴氏春秋大小戴禮博士。皆所以扶進微學。尊廣道藝也。」○元和二年春。東巡狩還過魯。

幸闕里以太牢祠孔子及七十二弟子作六代之樂大會孔氏男子二十以上者六十三人命儒者講論蘭臺令史孔僖因自陳謝帝曰今日之會寧於卿家有光榮乎對曰臣聞明王聖主莫不尊師貴道今陛下親屈萬乘辱臨敕里此乃崇禮先師增輝聖德至於光榮非所敢承帝大笑曰非聖者子孫焉有斯言遂拜僖郎中賜褒成侯及孔氏男女錢帛和帝永元十三年春帝因朝會幸東觀召見

諸儒魯丕賈逵黃香等相難數事。帝善丕說。特賜衣冠。丕因上疏曰。說經者傳先師之言。非從己出。若規矩權衡之不可枉也。難者必明其據。說者務立其義。浮華無用之言。不陳於前。故精思不勞。而道術愈章。法異者各令自說師法。博觀其義。無令幽遠獨有遺失也。安帝延光三年三月。幸泰山。祀孔子及七十二弟子於闕里。自魯相令丞尉及孔氏親屬。婦女諸生悉會。賜褒成侯以下帛。各有差。遂

還京師幸太學

三國蜀先主初定成都。于時喪亂歷紀。學業衰廢。乃鳩合典籍。沙汰衆學。以許慈。胡潛並為博士。與孟光。來敏等典掌舊文。

魏文帝詔以議郎孔羨為宗聖侯。邑百戶。奉孔子祀。令魯郡修舊廟。置百戶吏卒以守衛之。其外廣為室屋以居學者。

南宋文帝元嘉十九年。以闕里往經寇亂。黌校殘毀。命魯郡修復學舍。採召生徒。先廟地特

為營造。依舊給祠直。令四時享祀。魯郡民孔景等五戶居近孔子墓側。蠲其課役。供給洒掃。并種松柏六百株。

後魏孝文帝太和十九年。行幸魯城。親祀孔子廟。拜孔氏四人。顏氏二人為官。又詔選諸孔宗子一人封崇聖侯。邑一百戶。以奉孔子之祀。詔兗州為孔子起園柏。修飾墳壟。更建碑銘。褒揚聖德。

唐太宗貞觀二十一年二月。詔曰。左丘明卜子

夏公羊高。穀梁赤。伏勝。高堂生。戴聖。毛萇。孔安國。劉向。鄭衆。杜子春。馬融。盧植。鄭康成。服子慎。何休。王肅。王輔嗣。杜元凱。范甯等二十有一人。並用其書。垂於國胄。既行其道。理合崇褒。自今有事於大學。可並配享廟堂。

中宗景龍二年。始於修文館。置大學士四員。學士八員。直學士十二員。象四時八節十二月。以李嶠。宗楚客。趙彥昭。韋嗣立。為大學士。李適。劉憲。崔湜。鄭愔。盧藏用。李峤。岑羲。劉子

玄為學士。薛稷馬懷素宋之間武平。杜審
言沈佺期閻朝隱為直學士。又召徐堅韋元
旦徐彥伯劉允濟等滿負。其後被選者不一。
凡天子饗會游豫。唯宰相及學士得從。春幸
梨園。並渭水祓除。則賜細柳圈辟癘。夏宴蒲
萄園。賜朱櫻。秋登慈恩浮圖。獻菊花酒稱壽。
冬幸新豐。歷白鹿觀。上驪山。賜浴湯池。給香
粉蘭澤。從行給翔麟馬。品官黃衣各一。帝有
所感。即賦詩。學士皆屬和。當時人所歆慕。

玄宗開元二十七年。謚孔子為文宣王。衣衾冕。二京及州縣學孔子皆南向。十哲七十二賢及從祀諸儒。皆贈爵有差。

德宗素尚文雅。乘輿每幸學士院。顧問錫賚無所不至。御饌珍肴輟而賜之。又嘗召對於浴堂。移院於金鑾殿。對御起草賦詩唱和。或旬日而出。

五代周太祖廣順二年六月。幸曲昇謁孔子祠。既畢。將致敬。左右曰。仲尼。人臣也。無致敬之

文。太祖曰。文宣百代帝王師也。得無敬乎。即拜奠於祠前。其所奠金器銀鑪十數事。獨於祠所以脩享獻。遂幸孔林。拜孔子墓。

宋太宗淳化五年十一月丙寅。幸國子監。賜直講孫奭緋魚。後復幸國子監。令奭講尚書。至事不師古以克永世。匪說攸聞。帝曰。此至言也。商宗得賢相如此。因賜奭五品服。

真宗大中祥符元年。封泰山。次兗州。幸曲阜縣。謁文宣王廟。幸叔梁紇堂。近臣分奠七十

王倫書卷十三
弟子。遂幸孔林。加謚孔子曰玄聖文宣王。遣
官祭以太牢。給近便十戶奉塋廟。賜其家錢
三十萬帛三百匹。以四十六世孫聖佑為奉
禮郎。近屬授官。賜出身者六人。

仁宗慶曆四年。幸國子監。謁孔子。有司言舊
儀止肅揖。帝特再拜。賜直講孫復五品服。
理宗寶慶三年。詔曰。朕觀朱熹集註大學論
語孟子中庸。發揮聖賢蘊奧。有補治道。朕勵
治講學。緬懷典刑。可特贈熹太師。追封信國

公踰月。熹子工部侍郎在入對。言人主學問之要。帝曰。先卿中庸叙言之甚詳。朕讀之不釋手。恨不與之同時也。○淳祐元年春正月。下詔曰。朕惟孔子之道。自孟軻後不得其傳。至我朝周敦頤。張載。程顥。程頤。真見實踐。深探聖域。千載絕學始有指歸。中興以來。又得朱熹精思明辨。表裏混融。使大學論孟中庸之書。本末洞徹。孔子之道。益以大明于世。朕每觀五臣論著。啓沃良多。今視學有日。其令

學官列諸從祀。以示崇獎之意。遂加追封周
敦頤。汝南伯。張載。郿伯。程顥。河南伯。程頤。伊
陽伯。朱熹。徽國公。

遼義宗幼聰敏。好學。神冊元年春。立為皇太子。
時太祖問侍臣曰。受命之君。當事天敬神。其
有大功德者。朕欲祀之。何先。皆以佛對。太祖
曰。佛非中國教。帝曰。孔子大聖。萬世所尊。宜
先。太祖大悅。即建孔子廟。詔皇太子春秋釋
奠。

金熙宗皇統元年三月戊午親祭孔子廟北面再拜退謂侍臣曰朕幼年游佚不知志學歲月逾邁深以為悔孔子雖無位其道可尊使萬世景仰大凡為善不可不勉自是頗讀尚書論語及歷代史書或以夜繼日焉

元太宗初破汴梁用耶律楚材言遣人入城求孔子後得五十一代孫元措命齎封衍聖公付以林廟地

憲宗即位徵儒士高智耀入見言儒者所學

堯舜三代之道。自古有國家者。用之則治。不用則否。養成其才。將以資其用也。宜蠲其徭役。以勸勉之。帝問儒者何如。巫鑿對曰。儒以綱常治天下。豈方伎得比帝曰。善。前此未有告朕者。遂詔復海內儒士徭役。

武宗即位。加封孔子。詔曰。先孔子而聖者。非孔子無以明。後孔子而聖者。非孔子無以法。所謂祖述堯舜。憲章文武。儀範百王。師表萬世者也。朕纂承丕緒。敬仰休風。循治古之良

規舉追封之盛典。加號大成至聖文宣王。嗚呼。父子之親。君臣之義。仰惟聖教之尊。天地之大。日月之明。奚罄名言之妙。尚資神化。佑我皇元。

仁宗以宋儒邵雍。司馬光。張栻。呂祖謙。及故中書左丞許衡。從祀孔子廟庭。

英宗時。翰林學士忽都魯都兒譯進宋儒真德秀大學衍義。帝曰。脩身治國。無踰此書。賜鈔五萬貫。後以大學衍義頒賜羣臣。

國朝永樂四年三月。

太宗皇帝視學。先是勅禮部臣曰。朕惟孔子帝王之師。帝王為生民之主。孔子立生民之道。三綱五常之理。治天下之大經大法。皆孔子明之以教萬世。朕

皇考太祖高皇帝膺君師億兆之任。正中夏文明之統。復衣冠禮樂之舊。渡江之初。首建學校。親祀孔子。御筵講書。守帝王之心法。繼聖賢之道學。集其大成。以臻至治。朕承鴻業。惟

成憲是遵。今當躬詣太學。釋奠先師。以稱宗
儒重道之意。其合行禮儀。禮部詳議。以聞。禮
部尚書鄭賜言。宋制。謁孔子。服靴袍。再拜。

太宗曰。見先師禮。不可簡。必服皮弁。行四拜禮。

興學

五帝有成均之學

有虞氏太學為上庠。小學為下庠。

夏后氏太學為東序。小學為西序。

殷太學為右學。小學為左學。

周太學為東膠。小學為虞庠。○春夏學干戈。秋冬學羽籥。皆於東序。小學正學干。大胥贊之。籥師學戈。籥師丞贊之。胥鼓南。春誦夏弦。大師詔之。瞽宗秋學禮。執禮者詔之。冬讀書。典書者詔之。禮在瞽宗。書在上庠。

漢武帝時。文翁為蜀守。起學官。成都。帝乃令天下郡國皆立學校官。

光武建武五年。初起太學。車駕臨視。稽式古典。脩明禮樂。文物煥然可觀。仍賜博士弟子。

各有差

明帝永平二年。御明堂朝羣后。登靈臺以望雲物。饗射禮畢。正坐自講。諸儒執經問難於前。冠帶縉紳之人。圜橋門而觀聽者。蓋億萬計。其後復為功臣子孫別立學舍。搜選高能以授其業。自期門羽林之士。悉令通孝經章句。匈奴亦遣子入學。

晉元帝時。征南軍司戴邈上疏。以為喪亂以來。庠序隳廢。今王業肇建。萬物權輿。宜篤道崇

儒以勵風化帝信之始立太學

南宋文帝元嘉十五年。徵雷次宗至京師。開館於鷄籠山。聚徒教授。置生百餘人。會稽朱膺之。潁川庾蔚之。並以儒學監總諸生。時國子學未立。帝留心藝術。使丹陽尹何尚之立玄學。太子率更令何承天立史學。司徒叅軍謝元立文學。并次宗儒學為四學。各聚門徒多就業者。江左風俗於斯為美。後言政化稱元嘉焉。又車駕數幸次宗學館。資給甚厚。

唐太宗大徵天下名儒為學官。數幸國子監。使
之講論。學生能明一經者。皆得補官。增築學
舍。增廣生員。自屯營飛騎。亦給博士。使授以
經。能通經者。聽得貢舉。於是四方學者雲集
京師。乃至高麗。百濟。新羅。高昌。王。番酋長。亦
遣子弟請入國學。升講筵者。至八千餘人。
高宗咸亨元年五月。詔曰。諸州縣孔子廟堂。
及學館。有破壞。并先來未造者。遂使生徒無
肄業之所。先師闕奠祭之儀。久致飄露。深非

敬本。宜令所司速事營造。

肅宗時。蕭昕為國子祭酒。建請崇太學。以樹教本。帝寤其言。詔羣臣有籍于朝及神策六軍子弟肄業者。聽補生員。

宋太祖建隆二年冬十一月。臨國子監。詔增葺祠宇。塑繪先聖先師之像。自為贊書于孔顏之座端。令文臣分撰。餘贊屢臨幸焉。嘗謂侍臣曰。朕欲武臣盡令讀書。以知為治之道。於是臣庶始貴文學矣。

太宗端拱二年。幸國子監。時李覺為博士。帝
謁文宣王畢。即詔覺令對御講書。覺曰。陛下
六龍在御。臣何敢輒升。高坐。帝因降輦。令有
司張帟幕。設別坐。詔覺講周易之泰卦。從臣
皆列坐。覺因述天地感通。君臣相應之旨。帝
大悅。特贈帛百匹。

真宗咸平二年秋七月甲辰。幸國子監。召學
官崔俛。仝講尚書大禹謨。還幸崇文院。賜秘
書監祭酒以下器幣。

神宗元豐二年。頒學令。太學置八十齋。齋容三十人。外舍生二千。內舍生三百。上舍生一百。總二千四百。月一私試。歲一公試。補內舍生。間歲一會試。補上舍生。彌封謄錄。如貢舉法。上舍之試。學官不與考校。其上等命以官。中等免禮部試。下等免解試。三年定國子生員。取清要官親戚為之。額二百人。

徽宗崇寧元年。詔曰。學校崇則德業著。德業著則風俗醇。故教養人材為治世之急務。除

京師置外學待其歲攷升之太學○大觀二年詔曰學校興崇人材樂育法備令具勸懲已行深慮有司失實尚有遺材傳不云乎進賢受上賞救賢蒙顯戮閱前日賓興之數較其試中多寡惟常州為衆苟依常格推恩非古人上賞之意其知州教授特與轉一官
孝宗乾道四年二月幸太學祇謁先聖退御敦化堂命國子祭酒林光朝講中庸遂幸武學謁武成王廟監學官進秩一等諸生推恩

賜帛有差

理宗淳祐元年。謁孔子。遂臨太學。御崇化堂。命祭酒曹觴講禮記大學篇。監學官各進一秩。諸生推恩。賜帛有差。以紹定三年所製伏羲堯舜禹湯文武周孔顏曾子思孟子道統十三贊。就賜國子監。宣示諸生。復親書朱熹白鹿洞學規。賜焉。

元太宗初入汴。命脩太常禮樂。召名儒梁陟王萬慶趙著等。使直釋九經。進講東宮。又令大

臣子孫執經講義俾知聖人之道。置編脩所於燕京。經籍所於平陽。由是文治興焉。

世祖既下江南。時各郡教授悉以曠官。罷御史中丞。兼商議中書省事。葉李奏曰。陛下混一區宇。偃武脩文。可不作養人才。以弘治道。今各郡教授實風化所係。不宜罷。請復立提舉司。專提調學官課諸生。講明治道。而上其成才者於太學。以備錄用。帝可其奏。○至元二十四年。葉李為尚書右丞。復奏曰。善政不

可以徒行人才不可以驟進必訓以德義摩
以詩書使知古聖賢行事方畧然後賢良輩
出膏澤下流唐虞三代咸有胄學漢唐明主
數幸辟雍匪為觀美也乃薦周砥等十人為
祭酒等官及凡廟學規制條具以聞世祖皆
從之乃大起學舍始立國子監立監官而增
廣弟子員

國朝洪武二年十月。

太祖皇帝諭中書省臣曰學校之教至元其弊

極矣使先王衣冠禮義之教混為夷狄上下
之間波頽風靡故學校之教名存實亡況兵
變以來人習於戰鬪惟知干戈莫識俎豆
嘗謂治國之要教化為先教化之道學校為
本京師雖有太學而天下學校未興宜令郡
縣皆立學禮延師儒教授生徒以講論聖道
使人日漸月化以復先王之舊以革汙染之
習此最急務當速行之○八年三月命御史
臺官選國子生分教北方

太祖諭之曰致治在於善俗善俗本乎教化教化行雖閭閻可使為君子教化廢雖中材或墜於小人近北方喪亂之餘人鮮知學欲求方聞之士甚不易得今太學諸生中年長學優者鄉宜選取俾往北方各郡分教庶使人知務學人材可興於是選國子生林伯雲等三百六十六人給廩食賜衣服而遣之○十四年三月頒五經四書于北方學校

太祖謂廷臣曰道之不明由教之不行也夫五

經載聖人之道者也譬之菽粟布帛家不可
無人非菽粟布帛則無以為衣食非五經四
書則無由知道理北方自喪亂以來經籍殘
缺學者雖有美質而無講明何由知道今以
五經四書頒賜之使其講習夫君子而知學
則道興小人而知學則俗美他日收效亦必
本於此也

永樂十五年三月頒五經四書性理大全書
於六部并兩京國子監及天下郡縣學。

太宗謂禮部臣曰。此書學者之根本。而聖賢精義悉具矣。自書成。朕旦夕宮中披閱不倦。所益多矣。古人有志於學者。苦難得書籍。如今之學者。得此書而不勉力。是自棄也。爾禮部其以朕意曉諭天下學者。令盡心講明。無徒視為虛文也。

五倫書卷之十三

五倫書卷之十四

君道

善行

育才

成周大司徒以鄉三物教萬民而賓興之。一曰六德。知。仁。聖。義。中。和。二曰六行。孝。友。睦。婣。任。卹。三曰六藝。禮。樂。射。御。書。數。○命鄉論秀士升之。司徒曰選士。司徒論選士之秀者升之。學曰俊士。升於司徒者不征於鄉。升於學者

不征於司徒曰造士○樂正崇四術立四教順先王詩書禮樂以造士

漢武帝建元元年冬十月舉賢良方正直言極諫之士廣川董仲舒策對曰陛下夙寤晨興務以求賢亦堯舜之用心也而未云獲者士不素厲也夫不素養士而欲求賢譬猶不琢玉而求文采也故養士莫大乎太學太學者賢士之所關也教化之本原也願興太學置明師以養天下之士數考問以盡其才則英

俊宜可得矣。帝善其對。○元朔五年夏六月。詔曰。蓋聞導民以禮。風之以樂。今禮壞樂崩。朕甚閔焉。其令禮官勸學興禮。以為天下先。於是丞相弘等奏請。為博士官置弟子五十人。復其身。第其高下。以補郎中。文學掌故。即有秀才異等。輒以名聞。其不事學。若下材。輒罷之。又吏通一藝以上者。請皆選擇。以補右職。上從之。自此公卿大夫士吏彬彬多文學之士矣。

成帝綏和元年。時有言孔子布衣養徒三千人。今天子太學弟子少。於是增弟子貳三千人。

唐玄宗開元五年。始令鄉貢明經進士見訖國子監謁先師學官。開講問義。有司為具食。清資五品以上官及朝集使皆往閱禮焉。又勅州縣學生二十五以下。八品子若庶人二十以下。通一經及未通經而聰悟有文辭史學者。入四門學。為俊士郎。諸州貢舉省試不

第願入學者亦聽

代宗廣德二年詔曰古者設太學教胄子。雖年穀不登。兵革或動。而俎豆之事不廢。頃年戎車屢駕。諸生輟講。宜追學生在館習業。度支給廚米。是歲貢至。為侍郎建言。歲方艱歉。舉人赴省者。兩都試之。兩都試人自此始。

宋仁宗慶曆三年。詔曰。夫儒者。通天地人之理。明古今治亂之源。可謂博矣。然學者不得騁其說。有司務先聲病章句以拘之。則吾豪雋

奇偉之士何以預焉。士有純明朴茂之美。而無數學養成之法。其飭身勵節者。使與不肖之人雜而並進。則懿德敏行之人。何以見焉。此取士之甚弊。而學者自以為患。議者屢以為言。朕慎於改更。比今詳酌。仍詔宰府加之參定。以謂本學校以教之。然後可求其實。先策論則辨理者得盡其奧。簡程式則闕博者可見其才。至於經術之家。稍增新制。兼行舊式。以勉中人慎法。細文罷去。明其賞罰。俾各

勸焉。如此則待士之意周。取人之道廣。夫遇人以薄者不可責其厚。今朕建學興善以尊子大夫之行。而更制革弊以盡學者之材。其於教育之方勤亦至矣。有司其務嚴訓導。精察舉。以稱朕意。學者其思進德脩業而無失其時。凡所科條可為永式。○皇祐四年翰林學士趙槩言。通判陵州孫復經為人師。乃命與胡瑗同為直講。既居太學。其徒至不能容。取旁官舍處之。禮部所得士。瑗子弟十常居

四五。隨才高下。喜自脩飭。衣服容止。往往相類。遇之不問。可知為瑗弟子也。

神宗熙寧三年。下詔曰。化民成俗。必自庠序。進賢興能。抑由貢舉。而四方執經藝者。專于誦數。趨鄉舉者。狃于文辭。與古所謂三物實興。九年大成。亦已盭矣。今下郡國招徠雋賢。其教育之方。課試之格。令兩制兩省待制。以上御史三司三館雜議以聞。○四年冬十月。立太學生三舍法。初。國子生以京朝七品以

上子孫為之太學生以八品以下子弟若庶人之俊異者為之。試論策經義如進士法。及帝即位。垂意儒學。以天下郡縣既皆有學。歲時月各有試程。其藝能以差次升舍。其最優者為上舍。免發解及禮部試。而特賜之第。遂專以此取士。又以慶曆中嘗置太學內舍生二百人。帝漸增至九百人。至是乃盡以錫慶院及朝集院西廡建講書堂四。諸生齋舍。掌事直廬。始僅足用。自主判官外。增置直講為

十員。率二員共講一經。今中書遴選。或主判官奏舉生員。釐為三等。始入太學為外舍。定額為七百人。外舍升內舍。員二百。內舍升上舍。員百。各執一經。從所講官受學。月考試其業。優等上之中書。其正錄學諭以上舍生為之。經各二員。學行卓異者。主判直講復薦之于中書。奏除官。

徽宗大觀二年。詔曰。古之學者。三年通一經。計十五年。則五經皆通。熙寧中。進士以經術

期之尚淺。故止專一經。今已三十餘年。士益習矣。思得多聞博習之材。而慮專門之流弊。可自今學生願兼他經者。聽之。兼經多者。計所多量立升進之法。使天下全材異能得而進焉。○政和五年。詔曰。學校以善養人。設師儒。建黌宇。備膳羞。教天下士。十有三年。道日益明。士日益衆。庶幾於古。養士之額。尚循前數。有司拘以定額。士游學校外。不被教養於學者。尚多有之。則野有遺材矣。諸路學校額。

及百人以上者。三分增一分。百人以下增一
分之半。即陝西。河北。河東。京東路學生數少
者。仰提舉學事司具可與不可增及所增數
聞奏。○六年。詔曰。學校養士。以待士之自得
於先王之學。非專於賓貢而已。士牽於賓貢
蔽於流俗。故習尚秦漢隋唐而不見堯舜三
代。比閱時文。觀其志趣。率淺陋卑近。無足取
者。先王之遺文具在。讀其書。論其世。可考而
知。士不務此而趨走逐末。則朕稽參成周建

立法度何賴焉。其令太學辟雍提舉學事司
自今有能博通詩書禮樂稽古明道見天地
之大全者。置之上等。其人材拔俗者。不待考
選校定之數。具實狀以聞。朕將不次而用之。
國朝洪武十八年八月癸丑。

太祖皇帝命大都督府官選武臣子弟入國子
學讀書。

太祖諭之曰。武臣從朕定天下。以功世祿。其子
弟長於富貴。又以父兄早歿。鮮知問學。宜令

讀書知古今。識道理。俟有成立。然後命官。庶
幾得其實用也。昔霍光功非不高。身死未久。
而子孫橫肆。卒致夷滅者。不學故也。郭子儀
中興唐室。功蓋天下。位極人臣。而心常謙退。
保全令名。而福及後嗣者。識道理也。今武臣
子弟。但知習武事。特患在不學耳。○洪武二
十三年正月戊子。通政使茹瑄引奏潮州府
學生陳質言。其父戊大寧已死。今有司取其
補伍。自念從幼至今。荷蒙國恩教育。願賜卒

業以圖上報。

太祖謂兵部尚書沈潛曰。國家得一卒易。得一才難。此生既有志於學。可削其兵籍。遣歸進學。潛對曰。此生學未成效。若遽削其兵籍。則缺軍伍。

太祖曰。國家於人材必養之於未用之先。而用之於既成之後。譬之稼。必豫耕則有穫。若刈不待熟。則無用。且事有輕重。難拘一律。苟軍士缺伍。不過失一力士耳。若獎成一賢材。以

資任用其繫豈不重乎

永樂三年正月壬子先是

太宗皇帝命翰林院學士兼右春坊大學士解縉等於新進士中選材質英敏者俾就文淵閣進其學至是縉等選脩譔曾榮編脩周述周孟簡庶吉士楊相劉子欽彭汝器王英王直余鼎章敬王訓柴廣敬王道熊直陳敬宗沈升洪順章朴余學雙羅汝敬盧翰湯流李時勉段民倪維哲袁添祿吾紳楊勉二十八

人入見。

太宗諭勉之曰。人須立志。志立則功就。天下古今之人。未有無志而能建功成事者。汝等簡拔於千百人中。為進士。又簡拔於進士中。至此。固皆今之英俊。然當立心遠大。不可安於小成。為學必造道德之微。必具體用之全。為文必並驅班馬韓歐之間。如此立心。日進不已。未有不成就者。古之文學之至。豈皆天成。亦積功所致也。汝等勉之。朕不任爾以事。文淵

閣古今載籍所萃。爾各食其祿。日就閣中。恣
爾玩索。務實得於己。庶國家將來皆得爾用。
不可自怠。以孤朕期待之意。時庶吉士周忱
自陳年少。願進學。

太宗喜曰。有志之士也。命增忱為二十九人。遂
命司禮監月給筆墨紙。光祿給朝暮膳。禮部
月給膏燭鈔人三錠。工部擇近第宅居之。○
四年三月丙辰。進士陳紀等還鄉。陛辭。

太宗諭之曰。為學至以進士發身。亦出乎等倫。

然道理無窮。古人至老務學不厭。今人苟遂一得。即不復前進。故遠不逮古。汝等年富力強。當立志遠大。務進脩。非獨成己之德。將來國家亦得實才之用。紀等皆叩首謝。復諭之曰。鄉里父兄所在。不可以一得輒生驕慢。驕慢。凶德。孔子於鄉黨。恂恂似不能言。汝曹勉之。各賜鈔五錠。為道里費。

知人

帝堯曰。疇咨若時登庸。放齊曰。胤子朱啓明。帝

曰吁。嚚訟可乎。帝曰。疇咨若子采。驩兜曰。都。共工方鳩僝功。帝曰。吁。靜言庸違。象恭滔天。帝曰。咨四岳。湯湯洪水方割。蕩蕩懷山襄陵。浩浩滔天。下民其咨。有能俾乂。兪曰。於。鯀。我。帝曰。吁。咈哉。方命圯族。岳曰。異哉。試可乃已。帝曰。往。欽哉。允。載績。用。弗成。

周文王克知三有宅心。灼見三有俊心。以敬事上帝。立民長伯。

列國晉。孟孫獵得麇。使秦西巴持歸。其麇母隨。

而鳴西巴不忍縱而與之。孟孫怒而逐西巴。居一年。召為太子傅。左右曰。西巴有罪。今以為太子傅。何也。孟孫曰。夫以一魔而不忍。又焉忍吾子乎。

漢高帝以韓信與曹參灌嬰俱擊魏。帝問酈食其曰。魏大將誰也。對曰。柏直。帝曰。是口尚乳臭。安能當吾韓信。騎將誰也。曰。馮敬。曰。是秦將。馮無擇子也。雖賢不能當吾灌嬰。步卒將誰也。曰。項它。曰。是不能當吾曹參。吾無患。信

等遂與魏戰。大敗魏兵。虜魏王豹。定魏地。○
呂后嘗問帝曰。陛下百歲後。蕭相國即死。令
誰代之。帝曰。曹參可。問其次。帝曰。王陵可。然
陵少戇。陳平可以助之。平智有餘。然難以獨
任。周勃重厚少文。然安劉氏者。必勃也。可令
為太尉。呂后復問其次。帝曰。此後亦非乃所
知也。

文帝時。周亞夫為中尉。帝戒太子曰。即有緩
急。周亞夫真可任。將兵。及景帝即位。以亞夫

為車騎將軍。後吳楚七國反。乃拜亞夫為太尉。將三十六將軍往擊之。七國皆平。

景帝時。桃侯劉舍免相。竇太后數言宗屬魏其侯竇嬰。帝曰。太后豈以臣有愛相。魏其者。魏其沾沾自喜耳。多易。難以為相。持重。遂不用。而相建陵侯衛綰。

明帝時。牟融為大司農。是時帝方勤萬機。公卿朝會。輒延謀政事。判折獄訟。融經明才高。善論議。朝廷皆服其能。帝數嗟嘆以為才堪。

宰相。明年代伏恭為司空。舉動方重。甚得大臣節。

三國蜀先主以馬謖才器過人。好論軍計。丞相諸葛亮深加器異。先主臨薨。謂亮曰。馬謖言過其實。不可大用。君其察之。亮猶謂不然。以謖為參軍。又違衆議。以謖統大衆。與魏將張郃戰于街亭。謖果違亮節度。為郃所破。亮流涕而斬之。○先主知劉巴之賢。攻成都時。令軍中曰。其有害巴者。誅及三族。及得巴。甚喜。

而諸葛亮亦數稱薦之。辟為左將軍西曹掾。晉明帝時。王導從兄敦反。劉隗勸帝悉誅王氏。導率群從弟子姪二十餘人。每旦詣臺待罪。帝以導忠節有素。命還朝服。導稽首謝曰。逆臣賊子。何代無之。不意今者近出臣族。帝蹕而執之曰。茂弘方託卿以百里之命。是何言邪。

隋文帝時。薛世雄為將。性廉謹。凡所行軍破敵之處。秋毫無犯。帝嘉之。嘗從容謂群臣曰。我

欲舉薛世雄。群臣皆稱善。帝復曰。世雄廉正。節槩有古人之風。遂超拜右翊衛將軍。○辛
亥之為隋州刺史。時州牧多貢珍玩。惟亥之
所貢。並供祭之類。帝謂朝臣曰。人安可無學。
亥之所貢。稽古之力也。遷潞州刺史。

唐高祖時。皇甫無逸為御史大夫。時益部新開。
長吏橫恣。令無逸持節巡撫之。有忌無逸專
制方面。及素不相協者。誣陷無逸。與王世充。
蕭銑等交通。帝皆審其詐。曰。無逸在益州。極

為清正。蓋群小不耐。欲誣之也。又曰。無逸當官執法。無所迴避。必邪佞之徒。惡直醜正。共相搆扇也。所告者。遂皆坐斬。無逸既反命。帝勞之曰。公立身行己。朕之所悉。比多譖訴。但為正直。致邪佞所憎耳。無逸頓首陳謝。帝又曰。卿不負朕。何煩多謝。

太宗嘗謂侍臣曰。朕今面談公等得失。以為鑒戒。侍臣拜謝。太宗曰。長孫無忌。善避嫌疑。應物敏速。至於決斷事理。求之古人。而總兵

攻戰非其所長也。高士廉涉獵古今心術聰
俊臨難既不改節。為官亦無朋黨。所少者骨
鯁規諫。爾唐儉言辭俊利善和。解人稱材疏
行發言啓齒。事朕三十載。遂無一言論國家
得失。楊師道性行純善。自無銜過。而情寔怯
懦。未甚更事。急緩不可得力。岑文本性道敦
厚。文章自其所長。而持論常據經遠。自當不
負於物。劉洎性最堅貞。有利益然而意尚然
諾。偏於朋友。能自補闕。亦可以尚焉。馬周見

事敏速性甚貞正。至於論量人物直道而言。朕比任使多所稱意。褚遂良學問稍長性亦堅正。既寫忠誠甚親附於朕。譬如飛鳥依人。自加憐愛。比日以來。每試鞠大獄。將有任使。亦可以嘉之。○帝嘗論將帥。謂左右曰。當今名將。惟李勣。任城王道宗。薛萬徹三人而已。然李勣道宗不能大勝。亦不大敗。萬徹非大勝即大敗。

德宗時。李藩為徐州從事。節度使張建封卒。

濠州刺史杜蕪。誣奏藩搖動軍情。及召藩入見。帝望見其儀形。曰。此豈作惡事人。乃釋然除祕書郎。

憲宗時。裴度兼刑部侍郎。王承宗。李師道。謀緩蔡兵。乃伏盜京師。刺用事大臣。已害宰相武元衡。又擊度被傷墜溝。賊意已死。因亡去。議者欲罷度安二鎮反側。帝怒曰。度得全天下。若罷之。是賊計適行。吾倚度足破三賊矣。其後賊果平。多度之功也。

宋太祖幸西都。曹州人張齊賢以布衣條陳十策。及還。語太宗曰。我幸西都。唯得一張齊賢。異時可使輔汝為相也。

太宗召李沆入為翰林學士。後判吏部銓。嘗侍曲宴。帝目送之曰。李沆風度端凝。真貴人也。可屬大任。

真宗即位。召王旦為翰林學士。知審官院。通進銀臺封駁司。旦為人嚴重。能任大事。避遠權勢。不可干以私。嘗奏事。帝語左右曰。為朕

致太平者必斯人也。○駐蹕大名時召楊延昭訪以邊事。帝甚悅之。指示諸王曰。延昭父業為前朝名將。延昭治兵護邊有父風。深可嘉也。又謂宰相曰。延昭出踈外。以忠勇自效。朝中忌嫉者衆。朕力為保庇。以及於此。既而選邊州守臣。御筆錄示宰相。命延昭知保州。兼緣邊都巡檢使。

仁宗時范仲淹既坐貶。朋黨論方興。帝知仲淹之賢可大用。故卒置群議而用之。慶曆三

年春召為樞密副使。五讓不許，乃就道。既至數月，以為叅知政事。每進見，必以太平責之。○唐介以言事謫潭州，分珠獄發，奏方入。帝預料謂近侍曰：「唐介必不肯買。」按具奏覆，帝覽之果然。○歐陽脩為諫官，進朋黨論，其言切直，人視之如仇。帝獨獎其敢言，顧侍臣曰：「如歐陽脩者，何處得來？」

高宗時，趙鼎奏淮東宣撫韓世忠保明統制官許世安功賞事。帝曰：「世安勇雖不如呼延

通而曉事過之平居議論多有補於世忠時
延通亦隸世忠軍帝馭諸將至於偏裨亦知
其才之所長

元太祖定燕召見耶律楚材身長八尺美髯宏
聲太祖甚喜日見親用嘗與西域人占月蝕
西域人曰某夜月當蝕楚材曰不蝕至其夜
果不蝕楚材曰某夜月當蝕西域人曰不蝕
至其夜果蝕太祖常指楚材語太宗曰此人
天賜我家爾後軍國庶政當悉委之

國朝吳元年。

太祖御戟門。與給事中吳去疾等論政務。因謂之曰。吾以布衣起兵。與今李相國徐相國湯平章皆鄉里。所居相近。遠者不過百里。君臣相遇。遂成大功。甚非偶然。今掃除羣雄。撫有江南。人免離亂之苦。每終夜思之。不能安枕。人心難安而易動。事機難成而易壞。苟撫之失宜。施之不當。亂由是生。今中原未平。正焦勞之日。豈能坐守一方而忘遠慮乎。正當練

兵選將平定中原。諸將小心忠謹者。惟徐達。
聽受吾言。可任斯寄。常遇春果勇有為。可以
佐之。其餘或為偏裨。或以守城。皆有可用之
才。天若輔吾。諸將足以了之。去疾對曰。知臣
莫若君。

主上知人善任使。平定之功不難矣。

求賢

舜曰。咨四岳。有能奮庸熙帝之載。使宅百揆。亮
采惠疇。兪曰。伯禹作司空。帝曰。兪。帝曰。疇。

若予工。僉曰。垂哉。帝曰。俞。帝曰。疇若于上
下草木鳥獸。僉曰。益哉。帝曰。俞。帝曰。咨四
岳。有能典朕三禮。僉曰。伯夷。帝曰。俞。

商湯時。伊尹耕于有莘之野。湯使人以幣聘之。
囂囂然曰。我豈以湯之聘幣為哉。我豈若處
畎畝之中。由是以樂堯舜之道哉。湯三使往
聘之。既而幡然改曰。與我處畎畝之中。由是
以樂堯舜之道。吾豈若使是君為堯舜之君
哉。吾豈若使是民為堯舜之民哉。吾豈若於

吾身親見之哉

高宗立。思復興殷而未得其佐。乃恭默思道。夢帝與之良弼。高宗以夢所見視群臣。皆非也。乃使工畫其像。徧求於天下。得說於傅巖。是時說操版築。既至。高宗曰。是也。遂以為相。與論治道。殷國大治。

周文王初為西伯。將出獵。卜之曰。非龍非鸞。非熊非羆。非虎非豹。所獲霸王之輔。於是遇太公於渭水之陽。與語大詭。曰。自吾先君太公。

曰。當有聖人適周。周因以興。子真是邪。吾太公望子久矣。故號曰太公望。載與俱歸。立為師。

成王嗣位。求忠臣輔助已為政。乃作敬之詩。有曰。佛時仔肩。示我顯德行。作小毖之詩曰。予其懲而毖後患。莫予荦蜂。自求辛螫。肇允彼桃蟲。拚飛維鳥。未堪家多難。予又集于蓁。宣王欲得國子之能導訓諸侯者。樊穆仲曰。魯侯孝公。王曰。何以對。曰。肅恭明神而敬事。

耆老。賦事行刑。必問於遺訓。而咨於故實。不干所問。不犯所咨。王曰。然則能訓治其民矣。乃命魯孝公於夷宮。

列國。齊桓公設庭燎。為士之欲造見者。暮年而士不至。於是東野鄙人有以九九之術見者。桓公曰。九九何足以見乎。鄙人對曰。臣非以為足以見也。臣聞主君設庭燎以待士。暮年而士不至。夫士之所以不至者。君天下賢君也。四方之士皆以自論。而不及君。故不至也。

夫九九薄能耳。而君猶禮之。況賢於九九乎。
夫泰山不辭壤石。江海不逆小流。所以成高
大也。詩曰。先民有言。詢于芻蕘。言博謀也。桓
公曰。善。乃因禮之。朞月。四方之士相攜而並
至。

燕昭王既立。卑身厚幣。以招賢者。謂郭隗曰。
誠得賢士。與之共國。孤之願也。先生視可者。
得身事之。隗曰。古之人。君有以千金使涓人。
求千里馬者。馬已死。買其骨五百金而還。君

怒消人曰。死馬且買之。況生者乎。馬今至矣。
不期年而千里馬至者三。今王必欲致士。先
從隗始。況賢於隗者。豈遠千里哉。王遂為隗
築宮而師事之。於是樂毅自魏往。鄒衍自齊
往。劇辛自趙往。士爭趨燕。

漢高祖十一年。思用賢者。乃下詔曰。王者莫高
於周文。伯者莫高於齊桓。皆待賢人而成名。
今天下賢者智能。豈特古之人乎。患在人主
不交故也。士奚由進。今吾以天之靈。賢士大

夫之力。定有天下。以為一家。欲其長久。世世奉宗廟。亡絕也。賢人已與我共平之矣。而不與我共安利之。可乎。賢士大夫有肯從我游者。吾能尊顯之。布告天下。使明知朕意。其有意稱明德者。郡守必身勸為之。駕。

武帝元朔元年。詔曰。夫本仁祖義。褒德祿賢。勸賞刑暴。五帝三王所繇昌也。故深詔執事。興廉舉孝。庶幾成風。夫十室之邑。必有忠信。三人並行。厥有我師。今或至闔郡而不薦一

人是化不下究。而積行之君子壅於上聞也。且進賢受上賞。蔽賢蒙顯戮。古之道也。其與中二千石。禮官博士議不舉者罪。是時天下慎法。莫敢譔舉。而貢士益鮮。故有斯詔。○元封五年。詔曰。蓋有非常之功。必待非常之人。故馬或奔蹏而致千里。士或有負俗之累而立功名。夫泛駕之馬。跡弛之士。亦在御之而已。其令州郡察吏民有茂材異等。可為將相及使絕國者。

昭帝始元五年。詔曰。朕以眇身。獲保宗廟。戰戰栗栗。夙興夜寐。脩古帝王之事。通保傳傳。孝經論語。未云有明。其命三輔太常。舉賢良各二人。郡國文學高第各一人。

宣帝元康元年。詔曰。朕不明六藝。鬱于大道。是以陰陽風雨未時。其博舉吏民。厥身脩正。通文學明於先王之術。宣究其意者各二人。中二千石各一人。○丞相丙吉病篤。帝自臨問曰。君即有不諱。誰可代者。吉辭謝曰。群臣

行能明主所知。愚臣無所能識。帝固問。吉頌
首曰。西河太守杜延年。明於法度。曉國家故
事。前為九卿十餘年。今在郡治有能名。廷尉
于定國。執憲詳平。天下自以不寃。太僕陳萬
年。事母孝。博厚脩於行止。此三人能皆在臣
右。惟上察之。帝以吉言皆是。及吉薨。徵杜延
年。陳萬年相繼為御史大夫。于定國為丞相。
居位皆稱職。帝稱吉為知人。

光武建武七年。詔曰。比陰陽錯謬。日月薄食。

百姓有過。在予一人。大赦天下。公卿司隸州牧。舉賢良方正各一人。遣詣公車。朕將覽試焉。章帝建初八年。詔書辟士四科。一曰德行高妙。志節清白。二曰經明行脩。能任博士。三曰明曉法律。足以決疑。能按章覆問。文任御史。四曰剛毅多略。遭事不惑。明足照姦。勇足斷決。才任三輔。皆存孝悌清公之行。自今已後。審四科辟召。及刺史二千石察舉茂才尤異者。孝廉廉吏務實校試以職。

三國蜀先主屯新野訪士於徐庶。庶曰。諸葛孔明者。卧龍也。將軍豈願見之乎。先主曰。君與俱來。庶曰。此人可就見。不可屈致。將軍宜枉駕顧之。由是先主遂遣亮。凡三往乃見。與論當世之務。先主皆稱善。由是情好日密。關羽張飛等不悅。先主解之曰。孤有孔明。猶魚之有水也。願諸君勿復言。羽飛乃止。

唐高祖武德五年。詔曰。朕膺圖馭宇。寧濟兆民。思得賢能。用清治本。苟有才藝。所貴適時。潔

已登朝。母嫌自進。宜令京官五品已上及諸司總管刺史舉一人。其有志行可錄才用未申。亦聽自舉。具陳藝能。當加顯擢。授以不次賞罰之科。並依別格。所司頒下。詳加搜引。務在獎納。稱朕意焉。

太宗貞觀元年。帝謂尚書右僕射封德彝曰。比來令卿舉賢才。未嘗有所推薦。天下事重。宜分朕憂。對曰。臣愚豈敢不盡心。但今所見實無奇材異行。帝曰。前代明王。使人如器。不

借才於異代。皆取士於當時。何代無賢才。但患遺之不知爾。德彛慙而退。○三年。詔曰。白屋之內。閭閻之人。但有文武才能。灼然可取。或言行忠謹。堪理時務。或在昏亂而肆情過。太平而克己。亦錄名狀。與官人同申。○是年。以房玄齡。杜如晦。為僕射。帝謂玄齡如晦曰。公為僕射。當廣求賢人。隨才授任。比聞聽訟。日不暇給。安能助朕求賢乎。因敕尚書細務。屬左右丞。唯大事當奏者。乃關僕射。○十一

年詔令河北淮南諸州長官於所部之內精
加訪採。其有孝弟淳篤。兼閑時務。儒術該通。
可為師範。文詞秀美。才堪著述。明識治體。可
委字民。并志行脩立。為鄉里所推者。舉送洛
陽宮。各給傳乘。優禮發遣。當隨其器能。擢以
不次。若以老病不堪入朝者。具以名聞。庶巖
穴靡遺。俊乂可致。務盡搜揚之道。稱朕意焉。
高宗顯慶三年。帝謂宰臣曰。四海之廣。唯在
得賢。卿等用人。多存形跡。護避親知。不能盡

意甚為不取。昔祁奚舉子。古人以為美談。即使卿等兒姪有材。亦須依例進舉。

玄宗開元十四年。勅天下官人百姓有精於經史道德可尊。工於著述。文質兼美。宜令本司本州長官。指陳藝業。錄狀奏聞。其吏部選人亦令所司銓擇。各以名薦。朕當明試。自觀其能。若行業可甄。待以不次。如安有褒進。必加明罰。○二十三年。詔曰。每渴賢良。無忘餐寢。頃雖虛佇。未副旁求。其或才有王霸之略。

學究天人之際。智勇堪將帥之選。政能當牧
宰之舉者。五品已上清官及軍將都督刺史
各舉一人。孝弟力田鄉閭推重者。本州刺史
長官各以名聞。○二十六年制曰。朕之爵位
唯待賢能。雖選士命官。則有常調。而安卑退
迹。尚慮遺才。其內外八品以下官及草澤間
有學業精博。蔚為儒首。文詞雅麗。通於政術
為衆所推者。各委本州本司長官。精加搜擇。
具以聞薦。○二十九年詔曰。士人藏器衆何

以知。豈若父子之間。自相推薦。昔祁奚之舉祁午。謝安之任謝玄。良史書之。咸以為美。賢彥之士。何代無人。寧限嫌疑。致有拘忌。其內外官有親伯叔及兄弟并子姪中灼然有才術異能風標節行。通閑政理。據資歷堪充刺史縣令者。各任以名薦。

肅宗乾元元年。詔令京官五品以上。各舉忠正孝友文儒周慎堪任東宮官者。務取實材。不得虛薦。

德宗貞元四年。詔曰。賢良方正能直言極諫者。高蹈不仕。隱居巖穴。孝弟力田。聞於鄉里者。所在長官具名聞薦。諸色人中有清白政術。堪任刺史縣令者。常叅官各舉所知。朕當親自策試用之。

宋太祖雍熙二年三月。親試禮部貢士四百九十七人于崇政殿。始分三甲。錫宴于瓊林苑。進士及第第一人授節度推官。寵之以詩。遂為定制。帝謂侍臣曰。朕親選多士。殆忘飢渴。

召見臨問觀其才技而用之庶野無遺賢而
朝廷多君子爾

真宗策貢士于崇政殿擢第者千八百餘人
其間有晉天福中隨計者較藝之詳推恩之
廣未之有也帝連三日臨軒初無倦色○景
德二年增置六科曰賢良方正能直言極諫
科博通墳典明於教化科才識兼茂明於體
用科詳明吏理可使從政科識洞韜畧運籌
帷幄科軍謀宏遠材任邊計科以待京朝官

之被舉及被應選之士

仁宗慶曆四年以科舉進士明經諸科之外
又有特奏名別頭試之目。特奏名者始於晉
天福中以士之貢于鄉而屢絀於禮部或
試所不錄者積前後舉數叅其年而差等之
遇親策士則別籍其名以奏徑許赴試至咸
平三年是科至九百餘人焉別頭試者士有
親戚仕本州或為發解官及侍親遠官距本
州二千里令轉運司類試以十率之取三人

以貢焉。宋之取才。惟進士諸科。名卿鉅公皆由此選。○嘉祐二年。進士諸科待試京師者恒六七千人。一不幸有故不應詔。往往沉淪十數年。以此毀行於進者。不可勝數。王洙侍迓英閣。講周禮。至三年大比。大考州縣。贊鄉大夫廢興。帝曰。古者選士如此。今率四五歲一下詔。故士有抑而不得進者。孰若裁其數而屢舉之也。下有司議。咸請易以間歲之法。則無滯才之歎。薦舉數既減半。主司易以

詳較得士必精。且人少則有司易於檢察。偽濫自不能容。使寒苦藝學之人得進。於是下詔間歲貢舉。貢士諸科悉解舊額之半。增設明經試法。凡明兩經或三經。五經各問大義十條。兩經通八。三經通六。五經通五。為合格。兼以論語孝經策時務三條。出身與進士等。而罷說書舉人。○六年策賢良方正直言極諫之士于崇政殿。時王介、蘇軾、蘇轍皆在舉中。轍對切直。胡宿力請黜之。帝不許。曰：「求直

言而以直棄之。天下其謂我何。

英宗謂輔臣曰。館閣所以育俊才。比欲選人出使。無可者。豈乏才邪。又曰。卿等為朕各舉才行兼善者數人。雖親戚世家勿嫌。朕當親閱可否。於是韓琦。曾公亮。歐陽脩。趙鼎。所舉者凡三十人。

高宗謂宰執曰。朕思安民之道。無過擇監司郡守。可令侍從官公舉。仍不限員數。中書置籍。朕亦書之屏風。置諸左右。

金世宗思得賢才與圖至治。一日召宰臣謂曰。卿等職居輔相。曾無薦舉。何也。且卿等老矣。殊無可以自代者乎。惟朕嘗言某人可用。然後從而言之。卿等既無所言。必待朕知而後進用。將復有幾。顧張汝霖曰。若右丞相者。亦因石丞相言而知也。汝霖對曰。臣等苟有所知。豈敢不薦。但無人爾。帝曰。春秋諸國分裂。土地褊小。皆稱有賢。今天下之大。豈無人材。但卿等不舉而已。今朕自勉庶幾致治。他日

子孫誰與共治乎。汝霖等皆有慙色。一日帝又謂宰臣曰。今之用人。太拘資格。如此何能得人。汝霖對曰。不拘資格。所以待非常之才。帝曰。昔崔祐甫為相。未踰年薦八百人。豈皆非常才邪。

元世祖即位。召竇默至上都。問曰。朕欲求唐魏徵者。有其人乎。默對曰。犯顏諫諍。剛毅不屈。則許衡其人也。深識遠慮。有宰相才。則史天澤其人也。天澤時宣撫河南。帝即召拜右丞。

相。以默為翰林侍講學士。○至元二十三年。
命侍御史程文海搜賢江南。帝素聞葉李名。
諭文海曰。此行必致葉李來。李既至。勅集賢
大學士阿魯渾撒里館于院中。他日召見披
香殿。勞問卿遠來良苦。且詢以治道安出。李
歷陳古帝王得失成敗之由。帝首肯。賜坐錫
宴。命五日一入議事。

仁宗與宰相李孟論用人方。孟曰。人材所出。
固非一途。然漢唐宋以來。科舉得人為盛。今

欲興天下之賢能。如以科舉取之。猶勝於多門而進。然必先德行經術。而後文辭。乃可得真材也。帝深然其言。決意行之。延祐二年春。命孟知貢舉。及廷策進士為監試官。

國朝洪武六年四月。命吏部訪求賢才。

太祖皇帝曰。世有賢才。國之寶也。古之聖王。恒汲汲於求賢。若高宗之於傳說。文王之於呂尚。二君者。豈其智之不足也。而遑遑於版築鼓刀之徒。蓋賢才不備。不足以為治。鴻鵠之

能遠舉者為其有羽翼也。蛟龍之能騰躍者為其有鱗鬣也。人君之能致治者為其有賢人而為之輔也。今山林之士豈無德行文藝之足稱者。宜令有司採舉備禮遣送至京。朕將任用之以圖至治。○十九年七月詔舉經明行脩練達時務之士。年七十以下者。郡縣禮送京師。

太祖諭禮部郎中鄭居貞曰。古之老者雖不任以政。至於咨詢謀謨。則老者閱歷多而聞見

廣達於人情。周於物理。有可資者。居貞對曰。人至六十。精力衰耗。則不能勝事。請六十以上者不遣。

太祖曰。政為此。來有司不體朕意。士有耆年。便置不問。豈知老成。古人所重。文王用呂尚而興。穆公不聽蹇叔而敗。伏生雖老。猶足傳經。豈可槩以耄而棄之也。若年六十以上七十以下者。當置翰林以備顧問。四十以上六十以下者。則於六部及布政司按察司用之。

仁宗皇帝即位之初。命吏部令在京七品在外五品以上文官及知縣於五品以下見任官及軍民中訪舉德性淳篤行止端方或材能出衆政績顯著或文學有稱識見優遠者量材擢用。若有蔽賢及濫舉者論罪如律。所舉之人後犯贓罪舉者連坐。曰朝廷比年數下詔舉賢而奉行者率多徇私背公或以賄賂舉或以親故舉。所得實用十不三四。政事何由而理。生民何由而安。自今必嚴舉主連坐。

之法庶得實材

五倫書卷之十四